



**Komunikadu Imprensa**  
**08 Marsu 2024**

## **Loron Feto Internasionál**

### **JSMP kontinua enkoraza ema hotu atu hamutuk hakotu korente violénsia no diskriminasaun hasoru feto**

Loron 08 Marsu 2024 nu'udar Loron Internasionál Feto no kada tinan selebra hodi rekoñese luta, kontribuisaun feto sira inklui promove no hala'o asaun sira hodi realiza igualdade ba direitu sira feto nian.

Tema selebrasaun ba loron mundiál feto iha tinan ida ne'e mak "**Investe iha Feto, Aselera Progresu**". Tema ne'e sai hanesan serbisu ba iha parte hotu tantu governu no sosiedade tomak atu fó oportunidade no liberdade ba feto sira hodi goza sira nia direitu, mezmu feto barak sei kontinua moris vulneravel, sofre violénsia no diskriminasaun oinoin hosi família no mós sosiedade.

"Estadu Timor-Leste liuhosi instituisaun relevante sira governu nian halo ona esforsu oin-oin, atu dezenvolve feto no enkoraza partisipasaun feto iha aspeitu hotu-hotu. Mezmu nune'e, feto no labarik feto barak mak kontinua luta atu hakotu korente violénsia doméstika, violénsia seksuál no abuzu seksuál hasoru feto no labarik feto sira, no diskriminasaun ho forma oin-oin ne'ebé sira hasoru," dehan Sra. Ana Paula Marçal, Diretora Ezekutiva JSMP.

Diretora ne'e hatutan katak ho komemorasaun ne'e bolu ema hotu nia atensaun atu tau forsa hamutuk oinsa mak bele asegura no proteje feto sira hosi violénsia no diskriminasaun ne'ebé mak sira hetan, nune'e bele garantia katak feto sira bele livre hosi violénsia no goja sira ninia direitu.

Alende ne'e, komemorasaun ba loron importante ne'e mós nu'udar oportunidade atu haree no avalia dezenvolvimentu igualdade ne'ebé atinje ona iha nivel lokál no nasional, no mós enkoraja protesasaun ba feto no labarik sira hosi kualkér forma violénsia hasoru sira. Komemorasaun ne'e nu'udar kumprimentu ba obrigasaun konstitusionál ba norma internasionál sira ne'ebé Estadu ratifika ona.

JSMP mós rejista katak feto no labarik barak mak trauma, lakon sira-nia futuru tanba sofre violénsia no violasaun oinoin hosi sira-nia família no sosiedade. Situasaun no kondisaun hirak ne'e nu'udar rezultadu hosi prátika kulturál, ne'ebé nu'udar dezafiu iha konstrusaun ba kultura igualdade iha ita nia sosiedade.

JSMP deskobre realidade hirak ne'e hosi atividade monitorizaun regulár iha Tribunál Judisiál Primeira Instáncia hotu iha Timor Leste, hosi monitorizasaun

ne'e hatudu katak kazu violénsia doméstika, violénsia seksuál, abuzu seksuál hasoru menór inklui inestu barak mak julga ona iha tribunál sira. Bazeia ba monitorizasaun JSMP nian hosi Janeiru to'o Dezembru 2023, JSMP konsege monitoriza kazu krime hamutuk 533<sup>1</sup>, hosi totál kazu ne'e kazu Violénsia Bazeia ba Jéneru (VBJ) hasoru feto no labarik hamutuk 371 kazu no kazu seluk 162 kazu. Hosi totál kazu ne'e hatudu katak feto no labarik feto kontinua sai vítima.

JSMP apresia esforsu hotu-hotu ne'ebé Estadu halo liuhosi polítika oinoin atu asegura igualdade jéneru no polítika lejislative atu proteze feto no labarik feto hosi violénsia. Maski nune'e JSMP nafatin enkoraza entidade hotu kontribui hodi dezenvolve kultura igualdade iha ita nia sosiedade no espera katak komemorasaun Loron Feto Internasionál ne'e nu'udar komitmentu kolektivu no institusionál ida atu luta hodi hakotu violénsia hasoru feto no labarik feto sira iha Timor-Leste.

Relasiona ho komemorasaun loron importante ne'e, JSMP aproveita hodi kongratula feto hotu iha mundu, liuliu feto Timor-Leste ne'ebé korazen kontinua luta hodi defende maluk feto sira-nia direitu no luta ba lia-loos ho justisa.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

---

<sup>1</sup> Totál kazu ne'e la representa totál kazu hotu ne'ebé Tribunál Judisiál Primeira Instánsia hotu julga iha Janeiru to'o Dezembru 2023, totál kazu ne'e bazeia de'it ba kazu ne'ebé mak JSMP konsege monitoriza hosi Tribunál Judisiál Primeira Instánsia hotu.